

– Սատկի՛ Մըհեն, ես նրան էլ չպետք է սիրեմ, – պատասխանեց նա, երբ կրկին տեսաւ սպանոած շանը, որի ահագին դիակը պառկած էր բակի մէջ:

Միւս շները հաւաքուել էին եւ լիզում էին իրանց բարեկամի վերքը: Կարծես, ուզում էին բժշկել նրան:

Մենք գնացինք սենեակը:

– Ես գիտեմ Մըհեն ուր գնաց Մարօ:

– Ու՛ր գնաց:

– Չեմ ասի, վախեցում եմ ուրիշին ասես:

– Ես խօս երեխայ չեմ:

Ես յայտնեցի Մարօին, ինչ որ գիտեի Մըհեի ճանապարհորդութեան նպատակի մասին: Նրա դեմքն ընդունեց խիստ աղօտ արտայայտութիւն եւ խօսեց բարկացկոտ, դողողօջուն ձայնով:

– Ես հաւատում եմ, նա կանէ, նա պատրաստ է ամէն բան անել, երբ հայրս հրամայում է նրան: Ա՛խ, հայրս...

Նա խեղդեց իր ձայնը եւ չշարունակեց խօսքը:

Ռոպէական լռութիւնից յետոյ նա ասաց.

– Դու գիտե՞ս, Ֆարհատ, Մըհեն մարդասպան է:

– Որպե՞ս:

Մարօն պատմեց, թէ Մըհեն հաղբակեցի չէ, ինչ որ երկրից է, որի անու-
նը մոռացել է, բայց այն երկիրը շատ հեռու է: Թէ նա, Մըհեն ունեցել է մի քոյր,
որպէս ինքն է ասում, գեղեցիկ աղջիկ: Նրանց գիւղի աղայի տղան աչք է ու-
նեցել Մըհեի քրոջ վրայ: Քոյրը յայտնել է եղբօրը: Աղայի տղան հայ չէ լինում,
«անօրէնէ պարսիկ է լինում: Մի օր քոյրը մենակ գնում է դաշտից խոտ քաղե-
լու, աղայի տղան նրան բռնում է, չարչարում է... Մըհեն վրայ է հասնում եւ իր
դանակով նրա վիզը կտրում է, ու յետոյ թողնում է այն երկիրը, փախչում է:

Ես Մարօին պատասխանեցի, թէ այս գործի մէջ Մըհեն շատ յանցաւոր
չէ, թէ ես ինքս այնպէս կը վարուեի, եթէ մէկը համարձակուեր անպատուել իմ
քրոջը:

– Ես ինքս կը սպանեի մի այնպիսի տղին, եւ չէի թողնիլ, որ եղբայրս
մէջ մտներ, – պատասխանեց Մարօն: – Բայց Մըհեն այստեղ էլ շատ բաներ
է արել..

– Ի՞նչ բաներ: